

# SONETOS PA ROSIGÁ CUAN TRONA

## I – ÉL

Soleba yo amagame en un coscoll  
cuan tú pasabas, pita, con l'alforcha  
a la mediodiada, a ixa hora  
a la que'l engardaixo toma'l sol.

Tu pare t'asperaba, pero yo  
teniba al tozuelo una boira,  
un borguil de grapizos, una adoba,  
quémesio si antera u sólo un troz.

Chuflaba como una cardelina  
pa ve si t'atrivibas a trovame.  
Mai vas chirá la cara. Yo sofriba  
per ixas güebras sin garba ni gramen,  
pllorán to sumanciau día par día  
sin tú que t'atrivises a buscame.

## II – ELLA

Tu mare ya me'l diba, bafuroso,  
que eras faba, maula y baruquero,  
que cómo te queriba sen tan fiero,  
tan jauto, matután y cegaloso.

Me'l va alvertí mil veces, engrucioso;  
“el mío zagal é adán y zaborrero,  
el lleva to parello perque é un puerco,  
un brozas y un faltau zarrapastroso”.

Razón no le faltaba, fabirol;  
si fa u no fa vas siempre anerguellau  
como un carnuz. ¡Focín, mia que es totón!

Más penso que onque seigas malfarchau  
y roñes furo como un borinot  
me gustas cuan me miras añeblau.

### III – ÉL

No tengo brenca cllaro que me quieras,  
pa yo que te me'n ríes a la cara,  
me penso que'n tiens d'otri, y tiens la barra  
de feme lloqueá per ixas eras.

Remugo los totons sin pará cuenta  
del mal que ixo me fa, y al llegá a casa  
me tiro llargo al suelo, y unas brasas  
m'encetan el budillo y la'squena.

Prefiero más pensaye que lo nuestro  
no alcanzas a entendolo, y que bel día  
te se ubrirán los ojos, y un concieto  
t'arrastrará enta yo sin brenca mida.

Cuan llegue ya per fin ixe momento  
verás que la venganza está servida.

## IV – ELLA

Prou farta a yo me tiens, sí, mamaluco,  
las tuyas alcurrencias mai m'agradan,  
que has de sabé que te roda l'albarda  
cuan vas en coritatis per el mundo,

pos m'han contau que t'ha trovau alguno  
avetillán los autos per la pllaza,  
a amagatons fen momos a las yayas  
y llargo a rocegons per los escuros.

Bel día llegará un samalandrán  
y tú cairás al cepo. Para cuenta  
que una zarquinada como cal  
si no te pilla'l chiste te s'aspera.

A yo ya veis que tanto me se'n da;  
aván, y que ravente per an quiera.

## V – ÉL

A yo que pixes alto me la bufa,  
cara de prunas agrias no m'altera;  
mandá a escampá la boira é la manera  
que tiens de di que no te dé la murga.

Cuan vaz to las amigas, todas chuntas,  
te veigo aventá con forca pallera,  
más yo to ixo me'l tiro a la'squena  
de mientras que a tú to ixo t'enrruna.

Si estiras más el brazo que la manga  
te falta un bulliu de todas todas,  
pos no son fllos y rosas to las barzas.

Sin tú entendeye un sacre, fen la lloca  
de ventiún botons vas per la casa  
y yo te quiero como l'aigua poca.

## VI – ELLA

Yo quiero sé pa tú nomás, yo quiero  
contino ceprená la tuya alma,  
per los espinganez perdé la calma  
y que con yo tú seigas embustero.

Con tú los míos días yo aspero  
pasá, pos muera Marta, muera farta,  
que no cal, penso yo, sufrí la nafra  
de aquí este fin que ya veigo escllatero.

Tú coge carrereta y no me dices  
caé, mientras que punto per agulla  
te iré contán a peus chuntos matices  
que tanto te se'n dan, más si m'aduyas  
bufá y fé porrons será sé llibre;  
morí y podé sé al fin pa siempre tuya.

## VII – ÉL

¿Si no quies que se i sepa pa qué'l contas,  
si tú tiens poco pesquis pa qué'mpreñas,  
si la razón la tiens u mai u brenca  
pa qué mos viens hoy con las tuyas choldras?

Mos ruixas zalapastros, mos emporcas,  
mos fas cimbel pa res, mos tiens d'ansera,  
mos veis a toz nusatros como grellas  
y tú te fas la fuina y la rabosa.

¡Au, va!, pos a qué fin viens con chemecs;  
si quies fe el papú ya te'n puez i  
que no querim que sigas malmetén.

¡Bríncamos de deván! Si quies fuí  
nusatros a cullecas te metén  
y tú te desboldregas per astí.



## VIII – ELLA

No sé si has fuiu enta las Chesas,  
enta la Minaflores u enta Urría,  
si aturas los furons per la Valfría  
u t'has perdiu camino de Valdequia.

Per más que per Escloces y Morera  
yo feiga somatén, ni en las Artigas  
trovo rastro de tú, ni per Fechinás,  
ni per la basa Chil ni en la Cruceta.

Me sulses amagante pe'l Rosero,  
per los Palaus, los Sasos u Robal,  
allá a Campo las Viñas, a San Pedro,  
allá al Ojo la Fuente u a Canral.

Si quies jopá pe'l Pino u Pllanafierro  
penso acazate anda los Ferriñals.

## IX – ÉL

Me tiens como el que diz en carcañetas,  
me fas espacenciá día par d'otro,  
res te paece ben; si porgo l'ordio  
me diz que más caleba i a la güerta.

Si marcho a espigá las oliveras  
teniba que habé preparau el forno,  
y si me quedo a felo to son pllosos  
per no habé queríu ímene a defuera.

Contino tiengo el trillo per las patas,  
más cuan penso en jopá fuín d'un brinco  
me posas en cancions y t'afalagas.

Me fas pudrí la sangre, y de contino  
me fas i de reclus per las faixas  
en cuenta de i de frente. No t'aclaras.

## X – ELLA

Los dos vam como cagallón per cequia,  
sin guaires ganas y a mataballo,  
fenlo to a modo polka. Me rescaldo  
con tantos empandullos y correncias.

Yo a tú te va filá a la primera,  
tú a yo m'has iu filán más chino chano,  
y si seguim filanmos l'uno a l'atro  
me veigo chemecán la vida antera.

¿Quiés di que mos podrían perdoná  
toz los ixaguadientes? Yo querría  
estame al tuyo lau sin respirá,  
notá que de bislai tú me te miras,  
y si onra a tú te fa, be regulá  
que está chuntos un troz u to la vida.